



HABADA Alerta Risku Polítiku no Sosial sira kona-ba Desizaun Parlamentu Nasional Sosa Kareta ba Deputadu sira

Data: 9 Setembru 2025

Introdusaun

Lihosi relatóriu ida ne'e, Organizaun naun-governamental HABADA hato'o ami nia preokupasaun kle'an kona-ba Parlamentu Nasional nia desizaun foin lalais ne'e hodi aloka US\$4.2 millaun hodi sosa kareta foun hamutuk 65 ba Deputadu sira. Desizaun ne'e hetan kritika maka'as hosi comunidade akadémika, organizaun naun-governamental sira, no partidu polítiku opozisaun, no hamosu tiha ona mobilizasaun públiku ne'ebe lidera hosi estudante universitáriu sira.

HABADA rekoñese katak polémika ne'ebe hale'u desizaun ida-ne'e la'os limitadu ba kestaun administrativu ka lojístiku ida. Ida-ne'e reflète problema estrutural ida kona-ba lejitimidade, responsabilizasaun institusional, no sensibilidade polítika, iha tempu ne'ebe nasaun hasoru dezafiu sosioekonómiku sira ne'ebe sériu, inklui nivel aas sira pobreza nian, dezempregu juventude nian, no malnutrisaun krónika.

Nune'e, tuir karta ne'ebe estudante universitáriu sira hato'o ba Komandu-Jeral Polícia Nacional de Timor-Leste (PNTL), manifestasaun hasoru desizaun Parlamentu Nasional sei hala'o iha loron 15 fulan-Setembru tinan 2025. Ho ida ne'e liuhosi relatóriu ne'e ONG HABADA partilla ninia análiza no observaun sira kona-ba asuntu sira temi iha leten ne'e.

Manifestasaun nu'udar Direitu Konstitusional

Konstituisaun Repúblika Demokrátika Timor-Leste, Artigu 42, garante ba sidadaun hotu-hotu liberdade ba reuniaun pasifika no la-ho armas, nomós direitu atu halo manifestasaun tuir lei. Garantia ne'e hetan reforsu hosi Lei N.º 1/2006, loron 8 fulan FEVEREIRU, kona-ba Liberdade ba Reuniaun no Manifestasaun, ne'ebe define ho klaru enkuadramentu legal ba ezersísu direitu fundamental ida ne'e.

Tanba ne'e, imperativu tebes katak Estadu, liuhosi ninia autoridade sivil no polisia sira, asegura la'os de'it rekoñesimentu formal ba direitu ida-ne'e maibe mós ninia protesaun prátika, hodi kria kondisaun sira atu manifestasaun sira bele akontese ho dame, la-ho intimidasaun, represaun desproporsional, ka violasaun ba liberdade fundamental sira.

HABADA reafirma katak manifestasaun pasífika sira la konstitui ameasa ida ba orden demokrátiku, maibe sai hanesan ezersísiu lejítimu ida ba sidadania ativu ne'ebe hametin kultura demokrátika no responsabilizasaun hosi instituisaun públika sira.

HABADA nia Avaliasaun ba Risku sira

Tuir avaliasaun risku ne'ebe hala'o hosi ONG HABADA, identifika fator kriticu sira ne'ebe bele hamosu instabilidade polítika no sosial bainhira Parlamentu Nasional la halo revizaun ka la suspende desizaun sosa kareta foun ba Deputadu sira, hanesan tuir mai ne'e:

- **Risku polítiku:** Lakon lejitimidade Parlamentu Nasional nian no aumenta polarizasaun polítika entre governu no opozisaun, ho hametin narrativa sira kona-ba governasaun ladi'ak.
- **Risku seguransa:** Probabilidade aas ba manifestasaun ho eskala bo'ot iha Dili, ho poténsia ba blokeia estrada, konfrontu ho polisia, no distúrbiu públiku, bainhira infiltrasaun hosi parte terseiru.
- **Risku sosial:** Insatisfasaun públiku ne'ebe buras no radikalizasaun ba foin-sa'e sira, liuliu estudante universitáriu sira, ne'ebe haree desizaun ida-ne'e nu'udar símbolu korrupsaun no insensibilidade polítika.
- **Risku ekonómiku no reputasional:** Estraga imajen internacional Timor-Leste nian no lakon konfiansa hosi investidor sira, haree ba persesaun mal-administrasaun fiskal no instabilidade polítika.

Risku sira-ne'e, ONG HABADA klasifika kriticu, nune'e ezije resposta polítika sira imediata no transparente ne'ebe bele prevene eskalasaun protestu sira no hametin konfiansa iha instituisaun demokrátiku sira.

Análize no Opsaun Polítika sira

ONG HABADA konsidera katak iha opsaun polítika tolu ne'ebe identifika ona hosi debate públiku no análise risku sira, hanesan tuir mai ne'e:

1. Mantein desizaun akizisaun kompletamente kareta ba Deputadu sira

- Opsaun ida-ne'e aumenta risku ba protestu ka manifestasaun sira ne'ebe bo'ot, lakon lejitimidade no krize ba konfiansa públiku nian.
- Maski ida-ne'e fó benefísiu material ba Deputadu sira, maibe hamosu kustu polítiku no institucional sira ne'ebe la aseitavel.

2. Revizaun parsial ba desizaun (akizisaun fazeada ka redusaun ba númeru kareta sira)

- Ida-ne'e parsialmente mitiga reasaun públiku, maibe la halakon persesaun kona-ba insensibilidade polítika.
- Risku moderadu ba protestu ka manifestasaun sira, ho intensidade ne'ebe menus.

3. Suspende ka kansela desizaun akizisaun ba kareta

- Ida-ne'e hatan direktamente ba preokupasaun sosial no polítika sira.
- Hametin lejitimidade parlamentar no restaura konfiansa públiku nian.
- Rekursu orsamental sira rediresiona ba setor prioritáriu sira hanesan edukasaun, saúde no empregu ba foin-sa'e sira.

Haree ba situasaun ida-ne'e, ONG HABADA rekomenda atu halo suspensaun ka kanselamentu ba desizaun Parlamentu Nasional nian, nu'udar dalan atu salvaguarda estabilidade nasional no hatudu kompromisu jenuínu ba nesesidade populasaun nian.

Manifestasaun no Konseitu kona-ba Uza Forsa

Tuir karta ne'ebe estudante universitáriu sira hato'o ba PNTL, manifestasaun sei realiza iha loron 15 fulan Setembru tinan 2025. Nune'e, HABADA fó hanoin kona-ba atusaun polisia nian durante manifestasaun tenke tuir enkuadramentu legal ne'ebe konsagra iha Dekretu-Lei N.º 43/2011, Rejime Jurídiku Uzu Forsa nian. Lei ida-ne'e estabesele prinsipiu fundamental sira ne'ebe tenke orienta polisia nia intervensaun, hanesan tuir mai ne'e:

- **Proporsionalidade:** Forsa bele uza bainhira nesesáriu tebes atu restaura orden públika.
- **Legalidade:** Kualker uzu forsa tenke tuir lei no hahu ho alerta ka avizu sira ne'ebe klaru.
- **Nesesidade:** Forsa tenke sai hanesan rekursu ikus liu, hafoin dalan pasífiku hotu-hotu ba rezolusaun hotu ona ka la iha ona.
- **Responsabilidade no Akuntabilidade:** Uza forsa ne'ebe la loos hamosu responsabilidade kriminal, dixiplinar no sivil ba ajente sira no Estadu.

ONG HABADA subliña katak manifestasaun pasífika sira labele sujeita ba intimidasaun, violénsia ne'ebe la nesesáriu, ka dispersaun forsada. Kualker violasaun ba norma sira-ne'e sei reprezenta retrosesu (*kemunduran*) grave ida ba estadu direitu demokrátiku no protesaun ba direitus umanus.

HABADA nia Rekomendasaun sira

Bazeia ba análise sira iha leten ne'e, ONG HABADA apresenta rekomendasaun sira tuir mai ne'e ba Parlamentu Nasional, Governu no forsa seguransa sira:

1. Suspende ka kansela sosa kareta ba Deputadu sira, redireciona rekursu financeiru sira ba setor prioritáriu sira ne'ebe hatan ba nesesidade urjente sira populasaun nian.
2. Estabelese diálogu imediatu ho estudante sira, ONG sira, ka representante sira sosiedade sivil, no nakloke atu rona no konsidera sidadaun sira-nia preokupasaun lejítimu sira.
3. Reforsa preparasaun polisia nian hodi jere manifestasaun sira bazeia ba mediasaun, persuasaun, no téknika negosiasaun nian, evita uza forsa ne'ebe la nesesáriu.
4. Respeita no proteje direitu ba manifestasaun pasífiku, hodi garante seguransa ba manifestante sira no ba comunidade iha jeral.
5. Promove responsabilizasaun institucional, hodi rekoñese katak Parlamentu Nasional tenke fó ezemplu iha jestaun responsável ba rekursu públiku sira.

Konkluzan

Polémika atual kona-ba sosa kareta ba Deputadu sira sai hanesan símbolu governasaun ne'ebe ladi'ak no insensibilidade política iha nasaun ida ne'ebe hasoru dezafiu sosioekonómiku ne'ebe kle'an. Mantein desizaun sosa kareta ba Deputadu sira la'os de'it ameasa orden públika maibe mós estraga lejitimidade instituisaun demokrátiku sira no Timor-Leste nia imajen internasional.

HABADA reafirma, dalan di'ak liu atu prezerva estabilidade nasional maka suspensaun imediata ba desizaun Parlamentu Nasional kona-ba sosa kareta foun ba Deputadu sira, akompañia ho diálogu inkluzivu no transparente ho sosiedade. Defende direitu ba manifestasaun pasífiku tenke sai sentral ba kualker resposta governu nian, hodi garante katak sidadaun sira-nia lian hetan respeitu no kontinua konsolida demokrasia Timor-Leste nian.

Informasaun kle'an liu-tan halo favor kontaktu:

Abel Amaral

Diretor Ezekutivu

Mobile: +670 7745 4324

Email: abelamaral75@gmail.com

Website: www.habada.org